

# Euangelium C. XIII.

Gott ist verkleret in jm. Ist Gott verkleret in jm / so wird in Gott auch verkle-  
ren in jm selbs / vnd wird in bald verklere.

(New Gebot)  
Ich wil euch nicht  
beschweren mit  
vielen Gesetzen /  
wie Moses im al-  
ten Testament.  
Sondern das sol-  
len alle Gesetze im  
neuen Testament  
sein / Das jr euch  
liebet vnteruan-  
der. Darumb ist  
ein New vnd des  
neuen Testaments  
gebot / von allen  
Alten ausgeson-  
dert.

**L**eben Kindlin / Ich bin noch eine kleine weile bey euch. Ir werdet mich  
suchen / vnd wie ich zu den Jüden saget / Wo ich hin gehe / da künd jr nicht  
hin komen. Vnd sage euch nu / Ein new Gebot gebe ich euch / das jr euch vnternan-  
der liebet / wie ich euch geliebet habe / auff das auch jr einander lieb habet. Da bey  
wird jederman erkennen / das jr meine Jünger seid / so jr liebe vnternander habt.  
Spricht Simon Petrus zu jm / Herr / wo gehestu hin? Ihesus antwortet jm /  
Da ich hin gehe / kanstu mir dis mal nicht folgen / Aber du wirst mir hernach  
mals folgen. Petrus spricht zu jm / Herr / warumb kan ich dir dis mal nicht  
folgen? Ich wil mein Leben für dich lassen. Ihesus antwortet jm / Soltestu  
dein Leben für mich lassen? Warlich / warlich / Ich sage dir / Der Han wird  
nicht krehen / bis du mich drey mal habest verleugnet.

## XIII.



**V**nd er sprach zu seinen Jüngern / Ewer hertz erschrecke nicht. Glaubt  
an Gott / so glaubet jr auch an mich. In meines Vaters hau-  
se sind viel Wohnungen. Wens nicht so were / so wolt ich zu euch  
sagen / Ich gehe hin / euch die Stete zubereiten. Vnd ob ich hin-  
gienge euch die Stete zu bereiten / wil ich doch wider komen / vnd  
euch zu mir nemen / Auff das jr seid wo ich bin / Vnd wo ich hin gehe / das wisset  
jr / vnd den weg wisset jr auch.

Spricht zu jm Thomas / Herr / wir wissen nicht wo du hin gehest / vnd  
wie können wir den weg wissen? Ihesus spricht zu jm / Ich bin der Weg / vnd die  
Warheit / vnd das Leben. Niemand kompt zum Vater / denn durch Mich. Wenn  
jr mich kennet / so kennet jr auch meinen Vater. Vnd von nu an kennet jr in /  
vnd habt in gesehen.

Spricht zu jm Philippus / Herr / zeige vns den Vater / so genüget vns.  
Ihesus spricht zu jm / So lang bin ich bey euch / vnd du kennest mich nicht?  
Philippus / wer Mich sihet / der sihet den Vater / wie sprichstu denn / Zeige vns den  
Vater? Glaubestu nicht / das ich im Vater / vnd der Vater in mir ist? Die  
wort die ich zu euch rede / die rede ich nicht von mir selbs. Der Vater aber der  
in mir wonet / derselbige thut die Werck. Glaubet mir / das ich im Vater / vnd  
der Vater in mir ist. Wo nicht so glaubet mir doch vmb der Werck willen.

Warlich / warlich / Ich sage euch / Wer an mich glaubet / der wird die  
werck auch thun / die ich thu / vnd wird grössere denn diese thun / Denn ich gehe  
zum Vater. Vnd was jr bitten werdet in meinem Namen / das wil Ich thun / Auff  
das der Vater geehret werde in dem Sone. Was jr bitten werdet in meinem  
Namen / das wil ich thun.

(Tröster)  
Paracletus heisset  
ein Advocat / für  
sprecher oder Bey-  
stand für Gericht /  
der den Schül-  
ger tröset / sterck  
vnd hilfft. Also  
thut der heilige  
Geist auch vns  
im Gewissen für  
Gottes gericht /  
wider die Sünde  
vnd des Teufels  
anklage.

**L**ebet jr mich / so haltet meine Gebot. Vnd ich wil den Vater bitten / vnd  
den Geist der warheit / welchen die Welt nicht kan empfangen / Denn sie  
sihet in nicht / vnd kennet in nicht. Ir aber kennet in / denn er bleibet bey euch  
vnd wird in euch sein. Ich wil euch nicht Waisen lassen / Ich kome zu euch. Es  
ist noch vmb ein kleines / so wird mich die Welt nicht mehr sehen / Ir aber  
solt mich sehen / Denn ich lebe / vnd jr solt auch leben. An dem selbigen tage  
werdet jr erkennen / das ich in meinem Vater bin / vnd jr in mir / vnd ich in  
euch.

(Was ist)  
Wie gehet das zu?  
Was sol das sein?

Wer meine Gebot hat / vnd helt sie / der ist / der mich liebet. Wer mich  
aber liebet / der wird von meinem Vater geliebet werden / vnd ich werde in lie-  
ben / vnd mich in offenbaren. Spricht zu jm Judas / nicht der Ischarioth /  
Herr / was ist / das du vns wilt dich offenbaren / vnd nicht der welt? Ihesus  
antwortet